

四庫全書

子部

欽定四庫全書

子部

山堂肆考卷一百九十三
四

詳校官中書臣閔思毅

主事臣祁韻士覆勘

總校官降調編修臣倉聖脈

校對官中書臣葉蘭

謄錄監生臣李師弼

欽定四庫全書

山堂肆考卷一百九十三

明

彭大翼

撰

飲食

茶

茶經茶者南方嘉木自一尺二尺至數十尺其巴川
峽山有兩人合抱者樹如瓜蘆葉如梔子花如白薔
薇實如楫櫚蒂如丁香根如胡桃其名一曰茶二曰
檟三曰設四曰茗五曰餅

雀舌

毛文勝茶譜蜀州雀舌鳥嘴麥顆蓋取其嫩牙所造以其牙似之也又有片甲者早春黃茶牙葉相把如片甲也蟬翼者其葉軟薄如蟬翼也

龍團

高齋詩話建州大小龍團始于丁晉公成于蔡君謨宋太平興國二年始置龍焙造龍鳳茶咸平中丁晉公為福建漕監造御茶進龍鳳團慶厯中蔡端明為漕始造

小龍團茶歐陽永叔聞之曰君謨士人也何至作此事
自後熙寧未有旨下建州製密雲龍一品尤為奇絕按
龍團者餅印以龍鳳文也供御者以金粧龍鳳

陸羽茶經

唐陸羽字鴻漸有文學嗜茶著茶經三篇言茶之原之
法之具尤備天下益知飲茶矣又語林有常伯熊者因
羽論復廣著茶之功御史大夫李季卿宣慰江南次臨
淮知伯熊善煮茶召之伯熊執器煎季卿為再舉杯至

江南又有薦羽者召之羽衣野服持具而入公心鄙之
茶畢命奴子取錢三十文酬煎茶博士羽愧之更著毀
茶論

君謨茶錄

宋蔡襄進龍茶錄昔陸羽茶經不第建安之品丁謂茶
圖獨論採造之本至于烹試曾未有聞臣輒條數事簡
而易明勒成二篇名曰茶錄伏惟清閒之宴或賜觀采
按茶錄二篇上篇論茶色茶香茶味歲茶炙茶碾茶羅

茶候湯燭盞點茶下篇論茶焙茶籠砧椎茶鈴茶碾茶
羅茶盞茶匙湯瓶

綠花

杜陽編上每賜同昌公主饌其茶則有綠花紫英之號
白芽

東坡注草茶盛于兩浙日注第一自景祐以來洪州雙
井白芽製作尤精遠出日注之上遂為草茶第一

露芽

蜀之雅州蒙山頂有露芽穀芽皆云火前者言採造于
禁火之前也火後者次之又有枳殼芽枸杞芽枇杷芽
者皆能治風疾又有皂莢芽槐柳芽皆上春摘其芽和
茶作之又有五花茶者其片作五出花也

雲脚

茶譜袁州界嬌其名甚著不若湖州之研膏紫笋烹之
有綠脚垂下故吳淑賦雲垂綠脚又紫笋者其色紫而
似笋

稱為草魁

茶譜宣州宣城縣有了山形如小方餅橫鋪茗芽其上
其山東為朝日所燭號曰陽坡其茶最勝太守薦之京
洛人士題曰了山陽坡橫紋茶杜牧詩山實東吳秀茶
稱瑞草魁

呼曰酪奴

楊徽之洛陽伽藍記齊王肅歸魏初不食羊肉及酪漿
常食鯽魚羹渴飲茗汁高帝曰羊肉何如魚羹茗飲何

如酪漿肅曰羊陸產之最魚水族之長羊比齊魯大邦
魚比邾莒小國惟茗飲不中與酪漿作奴彭城王勰顧
謂曰卿不重齊魯大邦而愛邾莒小國何也肅對曰鄉
曲所美不得不好勰復謂曰卿明日顧我為卿設邾莒
之飧亦有酪奴因此呼茗飲為酪奴一名酪蒼頭亦曰
蒼頭奴故謝宗論茶云豈可以酪蒼頭便應代酒從事
北苑西山

瑞草總論建州北苑先春龍焙洪州西山白露安吉州

顧渚紫笋常州義興紫笋陽羨春池陽鳳嶺睦州鳩坑
南劍蒙頂石花露銚牙錢牙南康雲居峽州小江園碧
澗蔡明月蔡茱萸蔡東川獸目福州方山露牙壽州霍
山黃芽六安州小峴春皆茶之極品也

爛石礫壤

茶經上者生爛石中者生礫壤下者生黃土

蘄門旗鎗

蘄門團黃有一旗二鎗之號言一葉二芽也歐公詩共

約試新茶鎗旗幾時綠王荆公送元厚之詩新茗齋中
試一旗世謂茶之始生而嫩者為一鎗寢大而開為一
旗

蒙頂雲霧

東齋紀事蜀雅州蒙頂茶其生最晚常在春夏之交方
茶生常有雲霧覆其上若有神物護持之

學士例賜

金鑿密記故例翰林學士每春晚人困則日賜成殿茶

道士乞遺

神異記餘姚人虞洪入山採茗遇一道士牽三青牛引洪至瀑布山曰吾丹丘子也聞子善具飲常思見惠山中有大茗可以相給祈子他日有甌犧之餘乞相遺也洪因設奠祀之後常令家人入山獲大茗焉

早採晚採

爾雅早採者為茶晚採者為茗舜蜀人名曰苦茶故東坡詩周詩記苦茶茗飲出近世初緣厭梁肉假此雪昏

滯

官焙私焙

茗溪詩話北苑官焙也漕司歲貢為上壑源私焙也土人亦入貢為次二焙相去三四里間若沙溪外焙也與二焙絕遠為下故黃魯直詩莫遣沙溪來亂真是也官焙造茶常在驚蟄後

乘雷摘

茶譜蜀之雅州有蒙山山有五頂頂有茶園其中頂曰

上清峯昔有僧病冷且久嘗遇一老父謂曰蒙之中頂
茶常以春分之先後多搆人力俟雷之發聲併手採摘
以多為貴三日而止若獲一兩以本處水煎服即祛宿
疾二兩當眼前無疾三兩因以換骨四兩即為地仙僧
因之中頂築室以候及期獲一兩餘服未竟而病瘥年
至八十餘氣力不衰時到城人觀其容貌常若三十餘
眉髮紺綠後入青城山不知所終今四頂茶園不廢唯
中頂草木繁茂重雲積霧蔽虧日月鷲獸時出人跡罕

到矣

掃雪烹

見雪

金沙

茶譜湖州長興縣啄木嶺金沙泉即每歲造茶之所也
湖常二郡接界于此厥土有境會亭每茶時二牧畢至
此泉處沙中居常無水將造茶太守具儀注拜敕祭泉
頃之發源水甚清溢造供御者畢水即微減供堂者畢

水已半之太守造畢即酒矣太守或還旆稽期則示風雷之變或見鷲獸毒蛇水魑暘暎之類焉

玉壘

茶譜玉壘關外寶唐山有茶樹產于懸崖笋長三寸五寸方有一葉兩葉

鬻市

廣陵者舊傳晉元帝時有老姥每旦擎一品茗往市鬻之市人競買自旦至暮其器不減所得錢盡散路傍孤

貧乞人人或執而繫之于獄夜擊賣茗器自牖飛去

酹墳

茶譜胡生者以釘鉸為業居近白蘋洲傍有古墳每茶飲必奠酹之忽夢一人謂曰吾姓柳平生善為詩而嗜茶感子茶茗之惠無以為報欲教子為詩胡生辭以不能柳強之曰但率子意言之當有致矣生後遂工詩時人謂之胡釘鉸詩又異苑剡縣陳務妻少寡與二子同居好飲茶家有古塚每飲輒先祠之二子欲掘之母止

之夜夢人致感云吾雖潛身朽壤豈忘翳桑之報及曉
于庭中獲錢十萬似久埋者惟貫新耳

龜蒙入租

茶譜甫里先生陸龜蒙嗜茶薜置小園于顧渚山下歲
入茶租薄為甌犧之費自為品第書一篇繼茶經茶訣
之後

趙贊興稅

唐書德宗貞元中趙贊興稅而鹽鐵使張滂繼之長慶

初王播又增其數鄭注為權茶法詔王涯為權茶使涯變法益稅以濟用度而下益困矣

社前火前

學林新編茶之佳者造在社前其次火前謂寒食前也其下則雨前謂穀雨前也唐僧齊己詩高人愛惜藏巖裏白甌封題寄火前茶皆言火前蓋未知社前之為佳也

一水兩水

茶錄建安鬪茶以水痕先沒者為負耐久者為勝故較勝負之說相去一水兩水耳又建安人謂鬪茶為茗戰

悅志

神農食經茶茗宜久服令人有力悅志

降魔

山谷詩文書滿案惟生睡夢裏鳴鳩喚雨來乞與降魔
大圓鏡真成破樹作驚雷又唐白樂天詩破睡見茶功

御史瓶

御史臺記御史三院一曰臺院其僚曰侍御史二曰殿院其僚曰殿中侍御史三曰察院其僚曰監察御史察院廳居南會昌初監察御史鄭路所葺禮察廳謂之松廳南有古松也刑察廳謂之魘廳寢于此多鬼魘也兵察廳掌中茶茶必蜀之佳者貯于陶器以防暑濕御史躬親監故謂之御史茶瓶

驛官庫

茶錄江南有驛官以幹事自任白太守曰驛中已理請

一閱之乃往初至一室為酒庫諸醞皆熟其外畫神問何神也曰杜康刺史曰公有餘也又一室曰茶庫諸茗畢備復有神問何神也曰陸鴻漸刺史益喜又一室曰菹庫諸菹畢具復有神問何神也曰蔡伯喈刺史大笑曰不必置此

賜五十斤

唐大中三年東都進一僧年一百三十歲宣宗問服何藥而致然僧對曰臣少也賤不知藥性本好茶至處唯

茶是求或飲百碗不以為厭因賜茶五十斤令居保壽寺

惠三百片

唐盧仝謝孟諫議寄新茶詩日高丈五睡正濃軍將叩門驚周公口云諫議送書信白絹斜封三道印開緘宛見諫議面手閱月團三百片聞道新年入山裏蟄蟲驚動春風起天子未嘗陽羨茶百草不敢先開花仁風暗結珠琲瑠先春抽出黃金芽摘鮮焙芳旋封裹至精至

好且不奢至尊之餘合王公何事便到山人家柴門反
關無俗客紗帽籠頭自煎喫碧雲引風吹不斷白花浮
光凝椀面一椀喉吻潤二椀破孤悶三椀搜枯腸唯有
古文五千卷四椀發輕汗平生不平事盡向毛孔散五
椀肌骨清六椀通仙靈七椀喫不得唯覺兩腋習習清
風生

仙人掌

李白茶迷余聞荊州玉泉寺近清溪諸山山洞往往有

乳窟窟中多玉泉其水邊處處有茗草羅生枝葉如碧玉唯玉泉真公常采而飲之年八十餘歲顏色如桃李而此茗香滑異于他者所以還童振枯人人壽也余遊金陵見宗僧中孚示余茶數十片狀如手掌號仙人掌茶蓋新出于玉泉之山曠古未覲因特見遺兼贈詩要予答之遂有此作後之高僧大隱知仙人掌茶發于中孚及李白也

胡人鞞

茶經茶千類萬狀有如胡人鞞者蹙縮然犂牛臆者廉
譔然浮雲出山者輪困然輕飈拂水者涵澹然此茶之
精好者也有竹籜者枝幹堅實艱于蒸搗故其形籬篔
然有霜筍者莖葉凋沮易其狀貌故其形萎萃然此茶
之瘠老者也

出茶三般

茶譜涪州出三般茶賓化最上製于早春其次白馬最
下涪陵

收茶三等

蠻甌志覺林僧志宗收茶三等待客以驚雷英自奉以
萱草帶供佛以紫茸香赴茶者以油囊盛餘瀝歸

水厄

世說晉王濛好飲茶客至輒飲之士大夫甚以為苦每
欲候濛必云今日有水厄

乳妖

清異錄吳僧文了善烹茶游荆南高保勉子季興延置

紫雲菴曰試其藝保勉父子呼為湯神奏授華亭水大師上人目曰乳妖

玉蟬膏

清異錄顯德初大理徐恪見貽卿信鋌子茶茶面印文曰玉蟬膏又一種曰清風使按恪建人也

水豹囊

清異錄豹革為囊乃風神呼吸之具也煮茶吸之可以滌滯思而起清風故稱茶為水豹囊

茶加酥椒

鄴侯家傳唐德宗好茶加酥椒之類李邕戲為詩旋沫翻成碧玉池添酥散作琉璃眼

茶用鹽薑

志林唐人煎茶用薑然薛能詩鹽損添常戒薑宜著更誇則又有用鹽者矣

龍安騎火

茶譜龍安有騎火茶最為上品騎火者言不在火前不

在火後作也

澀湖含膏

茶譜義興有澀湖之含膏

魚目

因話錄李約汧公子也一生不近粉黛性嗜茶嘗曰茶
須緩火炙活火煎活火謂炭火之有焰者當使湯無妄
沸庶可養茶始則魚目散布微微有聲中則四邊泉湧
累累連珠終則騰波鼓浪水氣全消謂之老湯三沸之

法非活火不能成也

蟹眼

東坡煎茶歌蟹眼已過魚眼生颼颼欲作松風鳴蒙茸
出磨細珠落眩轉遶甌飛雪輕又謝宗論茶候蟾背之芳
香觀蝦目之沸湧

鶴嶺

茶譜洪州鶴嶺茶極妙

龍陂

清異錄開寶中竇儀以新茶飲予味極美奩面標云龍
陂山子茶龍陂是顧渚山之別境

換茶醒酒

蠶甌志白樂天方齋劉禹錫正病酒乃饋菊苗菴蘆服
鮓換取樂天六班茶二囊以醒酒

錫茶當酒

見酒

結菴

清異錄傳大士自往蒙頂結菴種茶凡三年得絕佳者
號聖楊花吉祥葢共五斤持歸供獻

為社

清異錄和凝在朝率同列遞日以茶相飲味劣者罰號
湯社

泛綠含黃

鄭谷詩簇簇新穿摘露光小紅園裏火煎嘗吳僧謾說
鴉山好蜀叟休誇烏嘴香合座滿甌輕泛綠開緘數片

淺含黃鹿門病客不歸去酒渴更知春味長

研膏焙乳

宋范文正公和章岷從事鬪茶歌溪邊竒茗冠天下武
夷仙人從古栽新雷昨夜發何處家家嬉笑穿雲去露芽
錯落一番榮綴玉含珠散嘉樹終朝采掇未盈檐唯求精
碎不敢貪研膏焙乳有雅致方中圭分圓中蟾北苑將期
獻天子林下雄豪先鬪美鼎磨雲笈首山銅瓶攜江上中濡
水黃金碾畔綠塵飛碧玉甌中翠濤起鬪茶味兮輕醍醐

鬪茶香分薄蘭芷勝若登仙不可攀翰同降將無窮耻

截玉

東坡詩貴人高宴罷醉眼亂紅綠赤泥開方印紫餅截
圓玉傾甌共歎賞竊語笑童僕

綴金

歸田錄茶之品莫貴于龍鳳團凡八餅重一斤小龍團
凡二十餘餅重一斤其價直金二兩仁宗尤所珍惜雖
輔相之臣未嘗輒賜惟南郊大禮致齋之夕中書樞密

院各四人共賜一餅宮人剪金為龍鳳花草綴其上兩
府八家分割以歸不敢碾試宰相家藏以為寶嘉祐七
年親享明堂始人賜一餅余亦恭與至今藏之因君謨
著錄輒附于後庶知小龍團自君謨始其可貴如此

蛻骨

山谷詩建溪有靈草能蛻詩人骨

喚夢

山谷以雙井茶送子瞻詩人間風日不到處天上玉堂森

寶書想見東坡舊居士揮毫百斛瀉明珠我家江南摘雲
腴落磴霏霏雪不如為君喚起黃州夢獨載扁舟向五湖
苦口

清異錄皮光葉最耽茗飲一日中表請嘗新柑筵具甚
豐簪紱叢集纔至未顧尊壘而呼茶甚急徑進一巨觥
題詩曰未見甘心氏先迎苦口師衆喙曰此師固清高
而難以療饑也

沾牙

清異錄胡嶠飲茶詩沾牙舊姓餘甘氏破睡當封不夜侯嶠
宿學雄才未至顯達為耶律德光所虜北去後間道復歸
輕身換骨

陶弘景雜錄芳茶輕身換骨昔丹丘子黃山君服之

瘠氣侵精

唐右補闕毋景休博學有著述性不飲茶著茶飲序釋
滯消壅一日之利暫佳瘠氣侵精終身之害斯大獲益
則功歸茶力貽患則不謂茶災豈非福近易知禍遠難

見者乎又東坡茶詩除煩去膩世固不可以無茶然暗中損人殆為不少

茗瘕

續搜神記桓宣武有一督將因病後虛熱便能飲復茗飲必以一斛二斗乃飽後有客造之更進五升乃吐出一物如升大有口形質縮縞狀如牛膾客乃令置盆中以斛二斗復茗澆之此物噲之都盡而腹中覺小脹又增進五升便恣混然從口中涌出既吐此物病遂瘥或問

之此何病答曰此病名複茗瘕

草癖

清異錄宣城何子華邀客于剖金堂酒半出嘉陽巖峻
畫陸鴻漸像子華因言前世感駿逸者為馬癖泥貫索
者為錢癖耽于子息者為譽兒癖耽于寢貶者為左傳
癖若此叟者溺于茗事將何以名其癖楊粹仲曰茶至
珍蓋未離乎草也草中之甘無出茶上者宜追目陸氏
為甘草癖坐客曰允矣哉

椒攬仙

清異錄猶子彞年十二有茶詩云生涼好喚雞蘇佛回味
宜稱椒攬仙

澗龕品

清異錄孫樵送茶與焦刑部書晚甘侯十五人遣侍齋
閣此徒皆乘雷而摘拜水而和蓋建陽丹山碧水之鄉
月澗雲龕之品慎勿賤用之

清人樹

清異錄偽閩甘露堂前兩株茶鬱茂婆娑宮人呼為清
人樹每春初嬪嬙戲摘新芽堂中設傾筐會

冷面草

清異錄符昭遠不喜茶嘗為御史同列會茶嘆曰此物
面目嚴冷了無和美之態可謂冷面草也

湯幻

清異錄饌茶而幻出物象于湯面者茶匠通神之藝也
沙門福全生于金鄉長于茶海能注湯幻茶成將詩一

句並點四甌共一絕句泛乎湯表檀越日造門求觀湯
戲全自詠詩曰生成盞裏水丹青巧畫功夫學不成却
笑當年陸鴻漸煎茶贏得好名聲

湯魔

清異錄調茶在湯之淑慝而湯最惡烟然柴一枝濃煎
蔽室又安有湯耶苟用此湯又安有茶耶所以為大魔
按蘇廡嘗作仙芽傳第九卷載作湯十六法以謂湯者
茶之司命若佳茶而濫湯則與凡味同調矣煎以老嫩

言者凡三品注以緩急言者凡三品以器標者共五品以薪論者共五品以老嫩言者三品謂第一名得一湯第二名嬰湯第三名百壽湯又名白髮湯以緩急者三品謂第四名中湯第五名斷脉湯第六名大壯湯以器標五品謂第七名富貴湯第八名秀碧湯第九名壓一湯第十名纏口湯第十一名減價湯以薪論五品謂第十二名法律湯第十三名一面湯第十四名宵人湯第十五名賊湯又名賤湯第十六名魔湯

飯

周書黃帝始蒸穀為飯烹穀為粥

一飯再飯

見太子

搏飯放飯

禮曲禮侍食於長者共食不飽共飯不澤手毋搏飯毋放飯毋揚飯注云共食求飽非讓道也不澤手者古之飯者以手與人共飯摩手而有汗澤人將惡之而難言

毋搏者若取飯作搏則易得多是欲爭飽也放謂食之
放肆揚謂以手散其氣嫌於欲食之急也

炊於壞屋

家語孔子厄于陳蔡從者七日不食子貢以所賣貨竊
犯圍而出告糴于野人得米一石顏回仲由炊于壞屋
之下有埃墮甑中顏回取而食之子貢自井望見之問
曰仁人廉士窮改節乎回曰改節即何稱于仁廉哉子
貢以所飯告孔子子曰吾將問之召顏淵曰疇昔子夢

見先人豈或啟佑我哉子炊而進飯吾將祭焉對曰有埃墨墮飯中欲置之則不潔欲棄之則可惜回即食之不可祭也孔子曰然乎吾亦食之

與以小盤

見游俠

脱粟

晏子春秋晏子相齊食脱粟飯又漢書公孫弘為丞相封侯食一肉脱粟之飯

折杭

前嘲噓上

玄山之禾

呂氏春秋飯之美者玄山之禾不周之粟陽山之稌南
海之秬

大梁之黍

張協七命大梁之黍瓊山之米唐稷播其根農帝嘗其
華

裹飯食友

見朋友

含飯哺兒

世說郝鑒字道徽值永嘉喪亂在鄉里甚窮餒鄉人以公名德共飴之公常攜兄子邁及外甥周翼二小兒往食鄉人曰各自饑困以君之賢欲共濟君耳恐不能兼有所存公于是獨往食輒含飯著兩頰邊還吐與二兒後並得存同過江郝公亡翼為剡縣解職歸席苦于公

靈牀頭心喪三年

孟嘗待客

孟嘗君待客夜食有人蔽火光客怒以為飯不等輟食
辭去孟嘗君起自持其飯比之客慙自刎

陳遺寄母

見子

令尹糲飯

楚孫叔敖為令尹食糲飯菜羹

太尉麥飯

東漢李固為太尉食麥飯又左雄為冀州刺史嘗食乾飯

落釜成糜

世說賓客詣陳太丘談鋒甚敏太丘乃令元方季方炊客與太丘論議二人進火俱委而竊聽炊忘著箠飯落釜中太丘問何不餽元方季方長跪曰大人與客語乃俱竊聽炊忘著箠飯今成糜太丘曰爾頗有所識否對

曰彷彿志之二子俱說更相易奪言無遺失太丘曰如此成糜自可何必飯耶

落席噉粒

見父

老尚善飯

見將帥上

饑須索飯

東軒筆錄宋章惇少善養生嘗云遇饑雖不相識處亦

須索飯若食飽時見爺亦不拜

胡麻

東漢明帝永平中剡縣有劉晨阮肇入天台山採藥迷
道路見二女絕色喚劉阮姓名因邀過家下胡麻飯
及山羊脯食之

玉屑

唐太和中有一人遊嵩山迷路見一人潔白枕一襖而
眠二人且問所自因開襖兩裏皆玉屑飯授與二人曰

分食此雖不足長生一生無疾乃起與二人指路

不妄過飯

漢第五倫字伯魚修行清白上謂曰聞卿為吏不過從
兄飯寧有之耶對曰臣生遭饑饉米石萬錢實不敢妄
過人飯

唯堪噉飯

隋文帝謂賀若弼曰我以楊素高頰為宰相汝倡言比
二人唯堪噉飯是何意也弼對曰誠有是言上怒甚然

思其功特令除名

淳沱進飯

漢更始時王郎兵起光武至南宮遇大風雨入道傍空
舍馮異抱薪鄧禹爇火帝對竈燎衣馮異復進麥飯兔
肩

惠州飽飯

黃山谷詩東坡謫嶺南時宰欲殺之飽喫惠州飯細和
淵明詩

與令對飯

漢書薛宣字贛君東海剡人入守左馮翊始高陵令楊
湛櫟陽令謝游皆貪猾不遜持郡短長前二千石數案
不能竟及宣視事詣府謁宣設酒飯與相對接待甚備
已而陰求其罪贓具得所受取乃密以手書曉之湛即
時解印綬付吏為記謝宣終無怨言而櫟陽令游自以
大儒有名輕宣宣獨移書顯責之游得檄亦解印綬去

與壻同飯

宋張文定公安道平生未嘗不衣冠而食嘗暑月與其
婿王鞏同飯命鞏褫帶而已衫帽自如鞏不敢公曰吾
自布衣諸生遭遇至此一飯皆君賜也享君之賜敢不
敬乎子自食某之食雖袂衣可也

黃梁

見夢感按本草黃梁穗大毛長其穀米俱麤于白梁而
收子少白梁穗亦大而長穀粗扁長不如粟圓也青梁
穀穗有毛粒青米亦微青而細于黃白梁

青精

見寒食又石髓謂之青泥飯出太行山清異錄寶歷元
年內出清風飯制度賜御庖令造進又錄內載謝諷食
經有越國公碎金飯

每食一石

崔鴻前秦錄苻堅以乞活夏默為左鎮郎胡人護磨那
為右鎮郎奄人申香為拂蓋郎默等身長一丈八尺並
多力善射三人每食飯一石肉三十斤

日食一升

見縣令

凝脂

王烈之安成記安成郡毛亭田疇膏腴厥稻馨香飯若凝脂

埋脯

仇池筆記江南人好作盤遊飯鮓脯膾炙無有不埋在飯下故里諺曰掘得窖子又羅浮頰老取諸飲食雜烹

之名骨董羹時陸道士出一聯曰投醪骨董羹鍋內掘
窖盤遊飯碗中

化螺

晉石崇家稻米飯在地經宿皆化為螺時人以為族滅
之應

化蛛

襍俎道士許象之言以盆覆寒食飯于暗室地上入夏
悉化為蜘蛛

滑憶雕胡

杜詩滑憶雕胡飯

香舂菰米

柳詩香舂菰米飯按本草菰又謂之茭白歲久中心生白臺謂之菰米其臺中有黑者謂之茭鬱至後結實乃雕胡黑米也

廣文不足

杜詩甲第紛紛厭梁肉廣文先生飯不足

措大不足

東坡志林昔有二措大相與言志一云我平生不足惟飯與睡他日得志當飽喫飯飯了便睡睡了便喫飯一云我則異于是當喫了又喫何暇復睡耶

告饑得飯

雜俎南嶽僧名悟空其嶽西原近朱陵洞洞甚嶮絕僧遊覽累日無幽不跡忽見前崖有道士坐繩牀僧告饑困道士起指石地曰此有米乃持斧斫石深數寸令僧

探之得陳米升餘即著於釜承瀑敲火煮飯勸僧食一口未畢道士笑曰君殮止此可謂薄我當畢之遂喫哽飯

失笑噴飯

蘇子瞻偃竹記文與可以所畫篔簹谷竹遺予云此竹數尺耳而有萬尺之勢篔簹谷在洋州與可嘗令予作洋州三十韻篔簹谷其一也予詩曰漢川修竹賤如蓬斤斧何曾赦籜龍料得清貧饒太守渭川千畝在胸中

與可是日與其妻游谷中燒筍供晚食發函見予詩失
笑噴飯滿案

山堂肆考卷一百九十三

欽定四庫全書

山堂肆考卷一百九十四 明 彭大翼 撰

飲食

粥

廣雅粥糜餽也釋名曰糜煮米使糜爛也粥濯於糜
粥粥然也周書黃帝烹穀為粥韻府粥稠者曰餽稀
者曰醅

黔敖待餓

禮檀弓齊大饑黔敖為食於路以待餓者而食之有餓者蒙袂輯屨貿貿然來黔敖左奉食右執飲曰嗟來食揚其目而視之曰子惟不食嗟來之食以至於斯也從而謝焉終不食而死曾子聞之曰微與其嗟也可去其謝也可食

祝染濟貧

昔有姓祝名染者常遇歲饑施粥以濟四方之貧者後生一子初赴試染夢一人手持狀元榜豎于門外上寫

四字曰施粥之報未幾有人報其子狀元及第

聲聞數里

見富人

口香七日

金鸞密記白居易在翰林賜防風粥一甌食之口香七
日

燕萋豆粥

漢更始時薊城反應王郎光武趣駕出城晨夜南馳至

蕪萋亭時天寒馮異上豆粥明旦帝曰昨得公孫豆粥
饑寒俱解

洛陽花粥

金門歲節錄洛陽人家寒食食桃花粥

為客辦粥

世說石崇為客作豆粥咄嗟便辦恒冬天得韭萍齏王
愷為搯腕乃密貨崇帳下都督問所以都督曰豆至難
煮唯預作熟客至但作白粥以投之韭萍齏是搯韭根

雜以麥苗爾

舉家食粥

見貧士

祀神

齊諧記吳縣張成夜起忽見一婦人立于宅南角舉手
招成曰此地是君家蠶室我即是此地之神明年正月
半宜作白粥泛膏於上以祀我已後年年大得蠶

禳鬼

見冬至

待漏進粥

清異錄魏王繼岌每薦羹以羊兔猪鬻參之時盧澄為
平章事趨朝待漏堂厨具小饌澄惟進粥其品曰粟粥
乳粥豆沙加糖粥三種並供澄取少許併和而食厨官
遂有王羹亥卯未相粥白玄黃之語

讀書畫粥

見貧士

著衣食粥

見伏日

典衣為粥

秦少游為黃本校勘錢穆父戶部尚書皆居東華門少
游春日有詩遺穆父云三年京國鬢如絲又見新花發
故枝日典春衣非為酒舉家食粥已多時穆父以米二
石送之

煮茗

茶錄吳人采茶煮之名茗粥

屑榆

唐陽城隱中條山歲饑屑榆為粥

以梁為粥

郭儀恭廣志遼東赤梁魏武帝以為御粥

和豆煮粥

宋范至能口數粥行家家臘月二十五浙米如珠和豆煮大杓轆鐺分口數疫鬼聞香走無處

羹

說文羹五味和也

燕食不貳

禮內則大夫燕食有膾無脯有脯無膾士不貳羹馘庶人者老不徒食注云士不貳羹馘亦謂燕食也又柳玘家誠余先君兄弟三人皆居清列非速客不貳羹馘以此皆保重名

常食無等

內則羹食自諸侯而下至于庶人無等注云羹與飯常
日所食故無貴賤之等差

菜羹瓜祭

論語孔子雖菜羹瓜祭必齊如也

藜羹不糝

莊子曰孔子厄于陳蔡之間七日不火食藜羹不糝又
庾袞羹不糝門人進飯曰已食訖

斟雉

楚辭彭鏗斟雉帝何饗王逸注云彭鏗好和滋味善斟
雉事帝堯

烹猴

淮南子曰楚有烹猴者而召其鄰人鄰人以為犬羹而
甘之後聞其猴據地而盡吐瀉其所食此未知味者

加鹽菜

周禮天官亨人祭祀供大羹鉶羹賓客亦如之注云大
羹肉涪鉶羹加鹽菜又三禮圖大羹不致五味鉶羹則

加鹽菜

芼葵葱

繆襲祭儀夏祠和羹芼以葵秋祠和羹芼以葱冬祠和羹芼以韭

染鼎

左宣四年楚人獻黿于鄭靈公公子宋與子家將見子公之食指動以示子家曰他日我如此必嘗異味及入宰夫將解黿相視而笑公問之子家以告及食大夫黿

羹召子公而弗與也子公怒染指於鼎嘗之而出

轅釜

見叔嫂

以羹殄民

左宣二年鄭公子歸生受命于楚伐宋宋華元樂呂禦
之將戰華元殺羊食士其御羊斟不與及戰斟曰疇昔
之羊子為政今日之事我為政與入鄭師故敗君子曰
羊斟非人也以其私憾敗國殄民刑孰大焉注云殺羊

食士謂殺羊為羹以享戰士也

以羹亡國

戰國策中山君享士司馬子期在焉羊羹不徧子期怒走楚說王伐中山中山君亡有二人挈手隨後問之曰臣父嘗餓且死君下壺飡哺臣之父故來死君也中山君曰吾以一椀羊羹亡國以一壺飡得二士死

叔教食菜

見飯

張翰思尊

尊羹見致仕又陸士衡詣王武子武子有數斛羊酪指以示陸曰卿東吳何以敵此陸曰千里尊羹未下鹽豉

熊羹

劉向新序紂王天下怒熊羹不熟而殺庖人

馳羹

陳思王製馳蹄為羹一甌千金號七寶羹

賜公權

唐柳公權以隔風紗書所作龍城記及八朝名品號錦
樣書以進上方御剪刀麴月兒羹即命分賜公權

賜林甫

明皇雜錄李林甫子壻鄭平為戶部員外郎一日林甫
就院省女因邀平見其鬢髮斑白謂平曰帝明日當賜
甘露羹鄭郎共食此羹縱華皓亦必鬢黑明日果有中
使至林甫第賜食因以羹與平食一夕鬢復黑

雙暈羹

清異錄竇儼嘗病目幾喪明良醫勸令頻食羊眼儼遂
終身食之其家名雙暈羹世人有呼為學士羹者

十遠羹

清異錄石耳石髮石線海紫菜鹿角菜天花草沙魚海
鰾白石決明蝦魁腊用雞羊鶉三汁和之十品不足聽
闕之忌入別物恐倫類雜則風韻去矣

香芹

杜詩滑憶雕胡飯香聞錦帶羹又曰鮮鯽銀絲膾香芹

碧澗羹

玉糝

蘇子瞻曰過子忽出新意以山芋作玉糝羹色香味皆
奇絕作詩云香似龍涎仍醜白味如牛乳更全清莫將
南海金齏膾輕比東坡玉糝羹按隋唐嘉話南人魚膾
以細鏤金橙拌之號為金齏玉膾隋時吳郡獻松江膾
煬帝曰所謂金齏玉膾東南佳味也

餅

餅餌閒談餅麩饘也搜麥麩使合併為之也然其狀不一入爐熬者名熬餅亦曰燒餅入籠蒸者名蒸餅亦曰饅頭入湯烹之名湯餅亦曰濕麩曰不托亦曰餽餽入胡麻著之名胡餅又曰麻餅其他餲餅髓餅環餅名不可數計大抵皆麩食也髓餅以豆屑雜糖為之環餅所謂寒具是也

饋餅一筍

東漢樊曄字仲華與世祖有舊徵為河東都尉引見雲

臺世祖微時嘗以事拘新野眭為市吏餽餅一笥帝不
忘乃賜御服食及乘輿衣物因戲之曰一笥餅得都尉
何如眭頓首辭謝

惠餅一顆

王歡耽學貧窶或人惠蒸餅一顆以充一日妻子嘗有
菜色

五倫奪母

東漢光武問第五倫曰聞卿為市掾有人遺卿母餅一

笥知從外來奪還之母食餅遂探口餅出之信有之乎
對曰實無此事衆人以臣愚蔽故為此言也

伏連怒妻

北齊庫狄伏連為大將軍性鄙吝冬至日有親表稱賀
妻設豆餅連大怒

好食胡餅

續漢書漢靈帝好胡餅京師皆食胡餅人謂董卓擁胡
兵破京師之驗

諱言胡餅

崔鴻後趙錄石季龍諱胡改胡餅為麻餅

食餅折字

晉何曾字穎考位太常性豪侈大官所供蒸餅上不折作十字不食

食餅汚書

見作畫

賣北市

見壁

齒東床

見婚禮

進餅食仙

見仙

啖餅杖子

隋暉狄士文為貝州刺史其子啖官厨餅杖二百

封餅以聞

孔帖高元裕兄少逸出為陝虢觀察使有中入責陝右
驛使供餅惡鞭之少逸封餅以聞宣宗怒召使者責曰
山谷間是餅豈易得耶謫隸恭陵於是中人皆斂手

袖餅而食

常朝記于琮在班中有時袖餅而食或遺同列

食餅蹲踞

晉王長文辟為別駕不肯就後於成都市蹲踞啣胡餅
刺史知其不屈禮遣之

鬻餅謳歌

見商賈

入朝買餅

嘉話劉僕射晏五鼓入朝時天寒中路見賣蒸胡餅之處熱氣騰輝使人買之以袍袖包裙帽底啗之且謂同列曰美不可言

入市盛餅

唐楊國忠自入市衣袖中盛胡餅

縮葱為餅

侯思止食籠餅必令縮葱加肉號縮葱侍郎按籠餅即
今饅頭

糲米為餅

唐王世充為秦王所圍糧且盡人相食至以水汨泥去
礫取浮土糲米屑為餅尚書郎皆餓死

大珠易餅

見珠

半臂易餅

唐玄宗皇后王氏始以愛弛不自安後承問后泣曰陛下獨不念阿忠脫紫半臂易麪為生日湯餅耶帝為之憫然改容阿忠者后呼其父仁皎云

消災餅

清異錄僖宗幸蜀乏食有宮人出方巾所包麪半斤許會村人獻酒一偏提溲麪燂餅以進嬪嬙泣奏曰此消災餅乞強進半枚

同阿餅

清異錄天成中帝令作同阿餅法用碎肉與麩漉和如臂刀截每隻二寸厚蒸之

餅賜進士

見登第

餅遺和尚

見僧

屋上置餅

拾遺記江東俗正月二十四日為天穿日以紅縷繫煎餅置屋上謂之補天穿

宅畔賣餅

見妻

拭刀

唐肅宗為太子時上使割羊臠以餅拭刀徐噉之上喜曰保福祿當如此愛惜又宇文士及嘗割肉以餅拭手

捲筋

歸田錄晏元獻清瘦如削每折半餅以筋捲之抽筋就
內捻頭一莖食之此亦異於人也

吳均餅說

吳均說細如華山玉屑白似梁甫銀泥既聞香而口問
亦見色而心迷

東哲餅賦

東哲賦三春之初陰陽交際寒氣既消溫不至熱于時
宴享則饅頭宜設炎律方回純陽布暢服絺飲水隨陰

而涼此時為餅莫若薄壯商風既薦大火西移鳥獸氄毛樹木疏枝肴饌尚溫則起漉可施玄冬猛寒清晨之會涕凍鼻中霜成口外充虛解戰湯餅為最

糕

周禮糗餌糝粉注云方言餌曰糕

九日糕

歲時記民間九日以片糕搭小兒頭上乳母祝云百事皆糕又糕上置小鹿數枚號食祿糕隋五行志童謠云

七月刈禾傷早九月食糕正好言豐年之兆也

八月糕

夢華錄京師八月秋社以社糕社酒相賞送

棗糕

藝苑雌黃寒食以麩為糕若蒸餅樣以棗拊之名棗糕

花糕

唐武則天花朝日遊園令宮女採百花和米搗碎蒸糕以賜從臣又趙宋九日以花糕法酒賜近臣

師德不食

嘉話錄袁師德給事中高之子也九日出糕謂坐客曰
某不忍食糕俛首者久之以父名高故耳

夢得不題

見重陽

肉

說文肴雜肉也膾漬肉也膾宗廟熟肉也穀梁傳生
曰脰熟曰膾蓋社肉也釋名熟肉有骨曰肴大臠曰

載曲禮注肉帶骨曰肴純肉曰載

夏山

帝王世記夏桀為肉山脯林

殷圃

公孫尼子曰殷紂為肉圃

餽賢

孟子繆公之于子思也亟問亟餽鼎肉

遺母

左宣二年初趙宣子畋于首山舍于翳桑見靈輒餓問其病曰不食三日矣食之舍其半問之曰宦三年矣未知母之存否今近焉請以遺之使盡之而為之簞食與肉真諸橐以與之

熊蹯

左宣二年晉靈公不君宰夫胹熊蹯不熟殺之真諸畚使婦人載以過朝注云熊蹯即熊掌最難熟

雞跖

呂氏春秋善學者若齊王食雞必食其跖數千而後足也又曰肉之美者猩猩之唇又張協七命封熊之蹠翰音之趾燕解猩唇髦殘象白注云髦獸名殘謂所食之殘也

遺細君

見社

遺亭長

綱目東漢卓茂為密令民嘗有言部亭長受其米肉遺

者茂曰亭長從汝求乎為汝有事囑而受之乎將平居自以恩意遺之乎民曰往遺之耳茂曰遺之而受何故言耶民曰竊聞賢明之君使民不畏吏吏不取民今我畏吏是以遺之茂曰汝為敝民矣凡人所以羣居不亂異于禽獸者以有仁愛禮義知相敬事也汝獨不欲修之寧能高飛遠舉不在人間耶

家貧不能置

東觀漢記閔仲叔容居安邑老病家貧不能置肉日買

猪肝一斤

性約不喜食

竇建德性約素不喜食肉飯脫粟加蔬具

為知茅容

東漢茅容字季偉迎徐孺子為沽酒市肉糲為飲食郭
泰曰孺子清廉高潔而為季偉飲酒食肉此為知季偉
賢故也

強詔李泌

唐李泌初不食肉肅宗乃強詔食肉

食惟一肉

漢公孫為丞相食惟一肉

食無兼肉

東漢劉虞為上公食無兼肉

不食羊

洛陽伽藍記齊王肅歸魏初不食羊肉及酪漿

不啖鹿

見神童

甄字取瘦

見名士

齊賢食肥

宋張齊賢每食肥猪肉數斤

自幼不食

楊收字藏之以母奉浮圖法自幼不食肉母約曰爾得進士第可食

沒身不食

北夢瑣言唐歸登性甚慳嗇常爛一羊脾旋割旋啖封其殘者一日登妻誤于封處割食登大怒由是其妻沒身不食肉

脯

說文脯乾肉也禮曰祭廟之禮脯曰尹祭尹正也

堯嬰

帝王世紀堯時厨中自生肉脯薄如嬰搖則風生使食

物寒而不臭名嬰脯

紂林

六韜紂以脯為林

腊人掌脯

周禮天官腊人掌乾肉凡田獸之脯腊膾胖之事注云
脯去骨腊帶骨膾全體胖半體

濁氏賣脯

漢書濁氏以賣脯而連騎張里以馬醫而擊鐘

設脯一束

國語楚成王聞子文之朝不及夕也於是乎每朝設脯一束糗一筐以羞與之子文即令尹子文鬪伯比之子於菟也

與脯二朐

呂氏春秋趙宣子將之絳見翳桑之下有餓人宣子與脯二朐拜受而不敢食問其故曰臣有母持以遺之宣子更賜之脯二束而去按屈中曰朐

高子遺公

公羊傳魯昭公出奔齊齊侯使高子執簞食四脰脯遺
公公稽首以衽受

沈后哺帝

白帖史思明陷沒河南遂失代宗睿真皇后沈氏所在
德宗即位令州縣物色咨訪高力士女頗能言禁中事
與女官李直一嘗從后游言狀差似后嘗削脯哺帝傷
左指高女亦以剖瓜傷指

趙高蒲脯

臧榮緒晉書趙高為丞相將作亂先設驗以野蒲為脯獻二世有言蒲者誅之

徐登桑脯

東漢徐登趙炳善巫術尚清儉每禮神以東流水為酌桑皮為脯

陳蕃待客

董謹續豫章記陳蕃待客拌飯以鹿脯芼羹以牛脯未

嘗別為異饌

左慈犒軍

神仙傳劉表出軍左慈詣劉表請犒軍有酒一器脯一盤百人接酒賜兵人人三杯酒一片脯萬人皆周而酒器如故脯亦不減

擘麟脯

神仙傳王方平與麻姑至蔡經家共設有膳擘麟脯而食之

贈虬脯

杜陽編上贈同昌公主御饌有紅虬脯

巨源結脯

韋巨源食帳有同心結脯蓋先結後風乾者

士良香脯

清異錄赤明香世傳仇士良家脯名也輕薄甘香殷紅
浮脆後世莫及

鮓

珍羞紀要鮓鮓也以鹽米釀魚肉為之

潤州貢

地理志潤州土貢鱖魚鮓

房州造

房州六月調羊酪造含風鮓

牡丹鮓

清異錄吳越有一種玲瓏牡丹鮓以魚葉鬪成牡丹狀
既熟出盎中微紅如初開牡丹

蘆服鮓

白樂天方齋劉禹錫饋蘆服鮓

陳陶酷嗜

江南野史陳陶所居不與俗接唯酷嗜鮓一啗或至十
齋

超宗詭言

王瑩代謝超宗為義興太守與謝交惡超宗到都瑩父
懋詣超宗超宗為設精白鮓美鮓懋問那得佳味超宗欲

激其怒詭言瑩始見餉且佯驚曰大人豈應不得耶懋
大忿言于朝廷稱瑩供養不足坐廢久之

野猪鮓

酉陽雜俎安祿山恩寵莫比其所賜品目有野猪鮓

池魚鮓

韓全誨傳唐昭宗至鳳翔帝輟所御膳賜全誨等李茂
貞食鮓美帝曰此後池魚茂貞曰臣養魚以候天子聞
者皆駭

沃酒

見博學

疊綿

清異錄吳淑冬日招客詩曉羹沈玉杵寒鮓疊金綿杵
謂小截山蕓綿乃黃雀脂膏

炙附膾

炙燔肉也牛與羊魚之腥聶而切之為膾

馬行

帝王紀紂宮九市車行酒馬行炙

魚薦

楚屈建曰祭典庶人有魚炙之薦

吳女爭魚

風土記吳王闔閭女驕恣嘗與王爭食魚炙怨恚而死

王母思雀

見繼母

牛心炙

晉王羲之年十二周顛異之時重牛心炙座客皆未噉
先割啖羲之乃知名

馳峯炙

雜俎將軍曲良翰作驢駿馳峯炙甚美又清異錄謝諷
食經中有龍鬚炙

逍遙炙

唐睿宗聞金仙玉真二公主飲素日令以九龍食罌裝
逍遙炙賜之

昇平炙

唐韋巨源為尚書令其食帳有昇平炙又段成式馳獵
饑甚叩村家主人老姥出羶臠五味不具成式食之有
踰五鼎曰老姥初不加意而味殊美如此自後令庖人
具此品因呼為無心炙

化魚 附膾

吳王行江中食膾有餘棄于水化為魚今名王餘魚是
也

化蝶

雜俎進士段碩常識南孝廉者善斫膾縠薄絲縷輕可吹起操刀響捷若合節奏因會客銜技先起魚架之忽暴風雨雷震一聲膾悉化為蝴蝶飛去南驚懼遂折刀不復作

郎官膾

海物異名記江南人喜作膾名郎官膾

天孫膾

謝諷食經有天孫膾

生羊膾

北齊武威王有生羊膾

飛鷺膾

食經有飛鷺膾又有吐嗟膾

張翰思

見致仕

宋龜造

廣陵法曹宋龜造縷子膾其法用鯽魚肉鯉魚子以碧筒或菊苗為胎骨

銀絲膾

杜詩鮮鯽銀絲膾白居易膾抽錦縷

水晶膾

黃山谷自號水晶膾為醒酒冰

盤雪

杜子美觀魚歌饗子左右揮霜刀鱠飛金盤白雪高

庖霜

韓退之詩庖霜膾玄鯽

鹽附醬

禮曲禮鹽曰鹹醎書潤下作醎說文東方謂之斥西方謂之鹵河內謂之醎然其類有二或引池而化周官所謂監鹽也今謂之顆鹽或煮海煮井及煮醎而成周官所謂散鹽也今謂之末鹽又會要青州鹽出于東海幽薊大同橫野有鹽池其鹽出于北海嶺南

鹽出南海劔南西川鹽出于井永康軍鹽出于崖井
并州鹽出于池是為齒地胡中鹽出于木又有出于
石西夏鹽有池其色青清異錄醬為八珍主人

煮海

黃帝時有諸侯宿沙氏始以海水煮乳煎成鹽其色有
青紅白黑紫五樣鹽之作自此始

熬波

見海賦

和羹

商書高宗命傅說若作和羹爾惟鹽梅

供膳

周禮天官鹽人掌鹽之政令以共百事之鹽祭祀共其苦鹽散鹽賓客共其形鹽散鹽王之膳羞共飴鹽后及王子亦如之注云苦鹽刮地之鹽取其成于自然散鹽熬波之鹽形鹽虎形鹽也飴鹽鹽之甜者今戎鹽有焉

享周公

見燕享

舉膠鬲

膠鬲遭紂之亂隱居賣鹽為業文王聞其賢舉以為相
孟子曰膠鬲舉于魚鹽之中

管子為國

管子海王論齊威公問何以為國管子曰惟幹山海可
耳海王之國謹正鹽筴十口之家十人食鹽百口之家
百人食鹽公乃使糶之得成金萬斤幹管也專主之也

黃霸治郡

見太守上

吳王煮水

漢吳王濞煮海為鹽

姚彪覆江

沈珍從姚彪貸鹽彪覆百斛于長江曰明吾不惜鹽惜所與耳

梁商乞民

漢梁商令蒼頭以牛車致米鹽菜錢于四城門外乞貧民不告以姓名

杜甫留客

見宅按蜀賓國產水精鹽明如水晶琢之為鹽以水濕之可和肉食

漢與牢盆

漢食貨志武帝財用匱竭孔僅東郭咸陽言山海天地之藏願募民因官器作鬻鹽官與牢盆按東郭履姓咸

陽其名也牢盆見諸鹽使鬻古煮字

唐立榷法

唐榷鹽之法起于第五琦及劉晏代其任法愈精密官無遺利初歲入錢六十萬貫季年十倍而人無厭苦大歷末通計一歲征賦所入而鹽醯當天下大半之賦

陵州井

郡志陵州井乃東漢天師張道陵所開曰狼毒井有毒龍藏井中及鹽神玉女為崇天師以道力驅出毒龍禁

玉女于井中然後人獲醜泉之利又邛州蒲江縣鹽井
乃祥符中民王鸞所開

寶應池

見奸邪

君王鹽

雜俎白鹽厓有鹽如水精名君王鹽

學士鹽

見諸鹽使

喪父不食

齊崔慰祖喪父不食鹽母曰汝既無兄弟又未有子毀
不滅性故當不肴饘耳鹽如何去吾今亦不食矣慰祖
不得已從之

喪母不食

梁張弘策丁母憂三年不食鹽

眇張傘

雜俎眇縣鹽井有鹽方寸中央隆起如張傘名曰傘

子鹽

大寧飛瀑

朝野雜記大寧之井醜泉出于山竇有如飛瀑民間分而引之

林甫販鹽

李林甫少年販鹽為生後事唐

似道販鹽

賈似道販鹽百艘至臨安賣之太學生有詩曰昨夜江

頭長碧波滿船都載相公醪雖知要作調羹用未必調羹用許多

火州赤白

古車師國今名火州其產鹽赤者如朱白者如玉

海南青紫

西域記海南有青紫鹽其味甚美

如霜

雜俎昆吾陸鹽周十餘里無水自生未鹽月滿則如積

雪味甘月虧則如薄霜味苦

勝雪

宋周邦彥字美成其少年遊詞并刀如水吳鹽勝雪李
白詩吳鹽如花皎如雪

天子執已下醬

禮樂記食三老五更于太學天子袒而割牲執醬而饋
報爵而醕注云饋進食也醕食畢而以酒虛口也

膳夫掌

周禮膳夫掌王之食醬用百有二十甕

藟醬

漢武帝使番禺令唐蒙風曉南越南越食蒙以藟醬本草曰藟醬似王瓜蔓生苗為留藤實似桑椹皮黑肉白食之下氣消穀左思蜀都賦所謂藟醬吳都賦所謂東風留通志藟醬曰浮留似華撥今嶺南取其葉及藤合檳榔食之

榆醬

白虎通榆莢醬曰醃

芍藥

芍藥之醬見枚乘七發

葫蘆

晉公遺語唐世風俗貴重葫蘆醬

連珠

漢武內傳西王母謂帝云神藥上有連珠之醬玉津金醬中有元靈之醬

沈香

神仙食經有十二香醬以沈香等油煎成服之

兼致魚醬

晉武帝與山濤書兼致魚醬一斗

謝賜蝦醬

梁劉孝儀有謝賜蝦醬啓

孝緒吐醬

王晏外弟阮孝緒知晏必敗嘗食醬美問得于晏家遂

吐而覆之及晏敗孝緒得免

祿山進醬

安祿山進鹿尾醬于明皇

醢附油

食品須知醢酸味亦曰醋釀米糟為之也清異錄謂
醋為食總管

和牲

禮內則膾春用葱秋用芥豚春用韭秋用蓼脂用葱膏

用薤三牲用藪和用醢獸用梅注藪菜萹也三牲牛羊豚也

柔肉

內則肉腥細者為膾大者為軒或曰麋鹿魚為菹麋為辟雞野豕為軒兔為宛脾切葱若薤實諸醢以柔之注云細切者為膾大片切者為軒實諸醢以柔之言肉與葱薤皆實諸醢浸漬而熟則柔軟矣

乞隣

論語孰謂微生高直或乞醯焉乞諸其隣而與之

貯寺

唐舊說聖善寺閭常貯醋數十甕恐為蛟龍所伏以致雷震也

仙藥

漢武內傳西王母謂帝曰仙藥有風林鳴酸

苦酒

魏名臣傳中書監劉放曰官販苦酒與百姓爭錐刀之

末請停苦酒注云苦酒醋也

吳氏所為

晉劉伶之妻吳氏因夫嗜酒敗事欲其節飲每釀酒則以鹽梅辛辣之物投之酒內致其味酸蓋不欲其飲也後人效其所為因以作醋一說醋自周人所造

唐俗所貴

晉公遺語唐世風俗貴重桃花酸

景略宴客

見酒下

俊臣鞠囚

唐來俊臣鞠囚不問輕重皆注醋于鼻

黃帝製已下油

黃帝得河圖書晝夜觀之乃令力牧採木實製造為油以綿為心夜則燃之讀書油自此始

許游添

許游為郡守廳前有一古墓命徙移他處開塚見一大

缸中有燈火其油將盡缸上有字曰許游許游與汝何仇五百年後為我添油許即買油注滿仍以土覆之

武庫積油

見火

占城貢油

五代周占城國貢猛火油


執畫汚油

見餅東坡詠二王書後曰怪君何處得此本上有桓玄

寒具油

覆錢酌油

見射



山堂肆考卷一百九十四